

ԵԿԵՂԵՑԱԿԱՆ ԺԱՄԱՆԱԿԱԳՐՈՒԹԻՒՆ.

Մ Ա Յ Ր Ա Թ Ո Ռ

Մայիսի սկզբից սկսուեցին Մայր Աթոռիս Հոգ. ճեմարանում հարցաքննութիւնները:

Վեհափառ Հայրապետը ներկայ է լինում քննութեանց մեծ մասին:

Ամսիս 15-ին ժամանեցին Մայր Աթոռս Մայր Տաճարի վերանորոգութեան յանձնաժողովի անդամներից պարոնայք—ճարտարապետներ Բաբանեան, Տէր Սարգսեան և Մատաթեան, նկարիչներ Բաշինջաղեան ու Յէթվաճեան: Պարոնները ներկայացրին Վեհափառ Հայրապետին տաճարի տրդի դրութեան յատակագիծն ու ուրուանկարները զանազան կողմերից և բերանացի զեկուցին վերանորոգութեան մանրամասնութիւնները:

Վեհափառ Հայրապետի հաճութեամբ նոյն օրը երեկոյեան ժամի 7-ին Սինօգի աւագ անդամ Տ. Գէորգ Արքեպիսկոպոսի նախագահութեամբ և Տ. Կոմիտաս վարդապետի քարտուղարութեամբ կազմուեց խորհրդակցութիւն, որին ներկայ էին Սինօգի, Հայրապետական Դիւանի, Տաճարի վերանորոգութեան Յանձնաժողովի անդամներն և Ս. Էջմիածին եկած ճարտարապետներն ու նկարիչները: Խորհրդակցութիւնը եկաւ հետեւեալ եզրակացութեան.

«Ա. Ի նկատի ունենալով, որ այժմեան վիճակում թողնել չի կարելի տանիքը, քանի որ անձրևներից Մայր Տաճարը խիստ քնասուում է, համաձայն ճարտարապետների և գեղարուեստագէտների առաջարկութեան՝ անպատճառ պէտք է ծածկել կտուրը, որչափ կարելի է շուտով, մինչև աշնանը վերջանայ:

«Բ. Տփլիսիի ճարտարապետների և նկարիչների խումբը պէտք է տնտեսապէս մրցութեան յայտարարէ Մայր Տաճարի վերանորոգութեան ծրագիրը նախապէս զեկուցանելով և ստանալով նորին Սրբութեան թոյլտուութիւնը մրցութեան պայմանների համար»:

«Գ. Աչքի առաջ ունենալով, որ առհասարակ Մայր Աթոռում կառուցուած շէնքերը իրար չեն համապատասխանում և շունեն մի ընդհանուր գեղարուեստական ճարտարապետական ներդաշնակութիւն, ուստի այսուհետեւ կառուցուելիք նոր շէնքերի համար անպայման պիտի դիմել մասնագէտ ճարտարապետների ձեռնհաս խորհրդին և կատարուի նոցա հսկողութեամբ շէնքերի կառուցումը»:

Ս. Էջմիածնի Մայրավանքի արեւմտեան պարսպից դուրս պէտք է շինուի նոր վիհարանը ճարտարապետ պ. Պ. Զահրաբեանի կազմած յատակագծով, որ հաւանութիւն է գտել Վեհ. Հայրապետից. հիմքը մասնագէտ տեխնիկի ցուցմունքներով և հսկողութեամբ արդէն փորւում է, և շինութեան նիւթերը մասամբ պատրաստ են: Յունիսի սկիզբներին կը լինի հիմնարկութիւնը:

Մայիսի 20-ին առաւօտեան 7¹/₂ ժամին այցելեց Մայր Աթոռս Սենատի վճառքեկ բաժնի օրեր-պրօկուրօր գաղտնի խորհրդական Նիկողայ Միխայիլովիչ Րէյնկէ իւր հետևորդների հետ և իջևանեց Վեհարանում:

Նորին Գերազանցութիւնը ներկայացաւ Վեհափառ Հայրապետին, շրջեց և տեսաւ Մայր Աթոռիս կարևոր հաստատութիւնները, Զուարթնոց աւերակ եկեղեցին, Վաղարշապատի հաշտարար դատարանը և, Վեհարանում ճաշելուց յետոյ, 2¹/₂ ժամին մեկնեց Երևան: